

等耶。故通云。爲化衆生。故意力起。故前七地中。雖暫現起而不爲失。直至八地已上。道力殊勝。始得畢竟不行耳。釋所知斷位中。亦又兩段。初至方永斷盡。明所知見修所斷種現之位。次八地已上之下。明諸識相應有現否不同。無漏觀心。第六識心也。及果相續。生空智果也。能違彼者。八地已去。生空智果。及所依心王。皆以轉成無漏。與同聚所知障相違。所以不復現行。第七識俱猶可現行者。第七相應法我見等四種。以微細故。八地已上。猶現行也。法空智果起位。方伏者。至第十地。法空智果起時。方乃伏盡也。前五轉識。設未轉依。無漏伏故。障不現起者。前五識俱法貪瞋癡三種所知。八地已上。雖未轉依。爲第六識無漏觀心之所伏。故亦不現起也。

○二別彰三位斷義

雖於修道十地位中。皆不斷滅煩惱障種。而彼麤重。亦漸斷滅。由斯故說二障麤重。一一皆有三位斷義。雖諸位中。皆斷麤重。而三位顯。是故偏說。

別彰斷義以釋難也。初正釋。二重通。修道十地位中。皆不斷滅煩惱障種。此句卽難辭。著一雖字。便

卽難辭爲釋辭。難辭謂據上通釋諸位斷義。於修道位中。皆不斷滅煩惱障種。何故前云修習位。俱斷二障及麤重耶。釋云。雖於修道位。皆不斷滅煩惱障種。然斷所知時。而彼煩惱麤重。如無堪任性者。亦漸斷滅。由斯故說煩惱所知二障麤重。一一皆有三位斷義。謂通達位。頓斷煩惱所知分別種。修道位。漸斷煩惱所知俱生種現等覺位。斷盡煩惱所知俱生種子。由此觀之。但不斷滅。非不漸斷也。恐又問云。若唯三位斷麤重。則資糧加行。皆不斷麤重耶。故重通云。雖諸位中。皆斷麤重。而三位

顯。是故偏說。非偏於三位能斷。餘位全不斷也。

○三詳種頓漸斷義二 初徵問二答釋

○初徵問

斷二障種。漸頓云何

問意謂二障斷義。約位通別。雖彰然種現互陳。頓漸猶未詳盡。單約二種。詳分頓漸。斷當云何耶。

○二答釋二 初釋所斷二釋能斷

○初釋所斷

第七識俱煩惱障種。三乘將得無學果時。一剎那中。三界頓斷。所知障種。將成佛時。一剎那中。一切頓斷。

任運內起無麤細故。餘六識俱煩惱障種。見所斷者。三乘見位真見道中一切頓斷。修所斷者。隨其所應。一類二乘。三界九地。一一漸次九品別斷。一類二乘。三界九地合爲一聚。九品別斷。菩薩要起金剛喻定。一剎那中。三界頓斷。所知障種。初地初心頓斷。一切見所斷者。修所斷者。後於十地修道位中漸次而斷。乃至正起金剛喻定。一剎那中。方皆斷盡。通緣內外。麤細境生。品類差別有衆多故。

初約七識相應二障種斷義。二約六識相應二障種斷義。七識相應俱生煩惱障種。以第七不能入

生空觀無漸斷義故。三乘將得羅漢獨覺如來無學果時。一剎那中三界頓斷。若第七識相應俱生所知障種。菩薩將成佛時。一剎那中一切頓斷。以此任運內起。執於第八。不緣於外境。唯一類。無有麤細。故唯頓斷。此七識相應俱生二障之頓斷也。餘六識俱煩惱障種。見道所斷分別起者。三乘見道位中。一切頓斷。修道所斷俱生起者。三乘隨其所應。斷有頓漸。謂二乘頓漸。大乘頓斷。二乘頓漸者。一類漸根。於三界九地。每地九品。先斷五趣雜居地九品。次斷離生喜樂地九品。乃至最後斷非

非想地九品。漸次九品別斷而成阿羅漢。一類頓根二乘。更有上中下別。於三界九地俱惑。合爲一聚。共爲九品。上根頓斷九品。中根先斷上三次。斷中三。後斷下三。下根九品一一別斷。先斷上上品。次斷上中品。乃至最後斷下下品。故經謂預流果人。有一生得阿羅漢者。有二生五生乃至七生得阿羅漢道者是也。大乘頓斷者。菩薩要起金剛喻定。一剎那中。三界頓斷。若六識相應所知障種。卽分別起者。亦非關二乘。唯在菩薩初地初心見道位中一切頓斷。若修斷者不同煩惱三界頓斷。要

於修道十地位中漸次而斷。乃至正起金剛喻定。一剎那中。方皆斷盡。以此六識俱者。通緣內外。細境生。品類差別有衆多故。是以漸斷。若總其大意。二障不離六七二識。七識二障不通。分別唯俱生故。三乘以及菩薩皆是頓斷。六識二障通乎分別俱生。分別煩惱三乘見位。得以頓斷。俱生煩惱小大之斷。頓漸不同。所知分別起者。菩薩初地初心得以頓斷。俱生起者。十地修位。斷亦漸次。必至金剛喻定而始盡也。

○二釋能斷

二乘根鈍漸斷障時。必各別起無間解脫。加行勝進。或別或總。菩薩利根。漸斷障位。非要別起無間解脫。刹那刹那能斷證故。加行等四。刹那刹那前後相望。皆容俱有。

復釋能斷。見大小利鈍不同也。二乘根鈍。漸斷障時。必各別起等者。謂無間斷惑。解脫證理。加行勝進。或總或別。總則俱時。別分前後也。菩薩刹那刹那能斷證者。斷惑與證理同時。非別起也。加行等四。卽等勝進無間解脫三位。皆容俱有者。一刹那中。四容俱有。卽四道同容於一刹那中也。問。二乘

鈍利無論。菩薩根性。雖利亦須久經多劫。佛道乃成。何云刹那刹那能斷證耶。曰。此有三義。一時雖無量攝在一刹那。故云處夢。謂經年悟。乃須臾頃。二精進修者。時不覺長。故云佛於無量劫。勤勇謂須臾。三雖說刹那刹那。殊不可量。故從初至後。有多無間解脫勝進道故。以上釋十障竟。

○四釋十如二 初正釋二通妨

○初正釋十 初釋徧行 至十業自在

○初釋徧行

十真如者一徧行真如。謂此真如。二空所顯。無有一

法而不在故

初標次釋。下皆做此。徧謂徧滿。行卽行相。謂此真如卽所顯也。二空。我法二空。卽能顯也。無有一法而不在。正徧行也。以初地施行。斷異生性障。空二分別。隨眠證法界。一分真理。徧一切。有爲行。無有一法非二空。故曰徧行真如。

○二釋最勝

二最勝真如。謂此真如具無邊德。於一切法最爲勝。故具無邊德。於一切法最勝之由也。如惡病。如怖畏。

如愚暗。如惡道等。乃一切法也。今離垢地。修行戒行。遠離邪行。犯戒之垢。其所證真如戒德。及具無邊德。於大惡病爲良藥。於大怖畏爲守護。於死愚暗爲明燈。乃至惡道海中爲大船筏等。豈非于一切法爲最勝也耶。故云最勝真如。詳智論中。

○三釋勝流

三勝流真如。謂此真如所流教法。於餘教法極爲勝。故。於餘教法極爲勝者。梁攝云。從真如流出正體智。正智流出後得智。後得流出大悲心。大悲流出十

二部經名爲勝流真如。餘教法非證此真如之所流者。今第三發光地。修行忍行。離闇鈍障。具勝定總持。流出無邊妙慧。照大乘法。故曰勝流真如。

○四無攝受

四無攝受真如。謂此真如無所繫屬。非我執等所依取故。

無所繫屬。如世親云。於此如中。無計我所。無攝我所。如北洲人。無繫屬故。非我執等所依取。謂非我執。我慢。我愛。無明邊見等。所依取故也。無繫屬。非依取。正無攝受。以第四談慧地。修精進行。斷微細

煩惱現行障。得出世間所證法界。名安住最勝菩提分法。非一切之所管屬。曰無攝受真如。

○五類無別

五類無別真如。謂此真如類無差別。非如眼等類有異故。

類無別者。生死涅槃皆平等故。梁攝謂由此真如。能令三世諸佛相續不異。衆生迷此。萬類差別。諸佛證此。居然不變故。以難勝地。修妙靜慮。斷下般涅槃障。真俗雙行。所證法界。畢竟無盡。無有變異。非如眼等。隨諸有情。各各差別。類有異故。曰類無

別真如。

○六無染淨

六無染淨真如。謂此真如本性無染。亦不可說後方淨故。

謂此真如本性無染。本性無淨可知。亦不可說後方淨故。不可說先曾染。又可知。以現前地修妙般若。斷麤相現行障。證得真如。觀十二緣起法。無染無淨。名此真如爲無染淨故。表此真如本無染淨。遮其不可說後方淨而無染。曰無染淨真如。

○七法無別

七法無別真如。謂此真如雖多教法種種安立。而無異故。

教依如立。教法既多。如若別。不知教法雖種種安立。曰法界。曰法性。曰實相。曰無相等。名有異。而如無異也。以遠行地。修方便行。斷細相現行障。入妙無相觀。證法無差別。了種種教法。皆同真如。無有二相。曰法無別真如。

○八不增減

八不增減真如。謂此真如離增減執。不隨淨染有增減故。卽此亦名相土自在所依真如。謂若證得此真

如已現相現土俱自在故。

第八不動地。修行願行。斷無相中作加行障。所證真如。名不增減。謂此真如離增減執。以染法滅時。不隨染法有減。淨法增時。不隨淨法有增。真得無生法忍。不見一法有增減。故即此亦名相土自在。所依真如。謂此所證。是相自在之所依止。隨所欲相。即能現前。十身相作故。謂此所證。是土自在之所依止。隨所欲土。成金寶等。即現前故。

○九智自在

九智自在。所依真如。謂若證得此真如已。於無礙解得自在故。

謂第九善慧地。修行力行。斷利他不欲行障。證得智自在。所依真如。謂若證得此真如已。於四無礙解。任運自在。善說法要。四無礙。即智自在。智自在。是能依。所證真如是所依。言是智自在之所依止。曰智自在。所依真如。

○十業自在

十業自在。等所依真如。謂若證得此真如已。普於一切神通作業。總持定門。皆自在故。

第十法雲地。修妙智行等滿足。斷諸法中未得自

在障。所證真如。爲神通之所依止。所依既勝。能依自殊。故神通作業等。皆得自在。故名業自在等所依真如。廣如淨名不思議品。

○二通妨

雖真如性實無差別。而隨勝德。假立十種。雖初地中已達一切。而能證行。猶未圓滿。爲令圓滿。後後建立。恐問真如之性實無有別。別立十種何也。故云雖真如性實無差別。隨真如德。假立差別。不以名別性遂別也。問云。初地見理已達一切。名爲徧行。何必更立後九種耶。故云雖達一切。而能證行。猶未

圓滿。爲令圓滿。後後建立耳。能證行。卽十波羅蜜。又初約所證爲妨。二約能證爲妨。雖分能所。所不離能。德隨證行。顯有淺深。能不離所行。由性德而證高下。卽能卽所。全所全能。別而無別。無別而別。已上第四釋十如竟。

○五釋轉依二 初結前起後二正釋轉依

○初結前起後

如是菩薩。於十地中勇猛修行十種勝行。斷十種障。證十真如。於二轉依便能證得。

○二正釋轉依二 初明位別二明義別

○初明位別
初總標
二別釋

○初總標

轉依位別畧有六種。

○二別釋
六 初損益轉
二通達轉
三修習轉
四圓滿轉
五下劣轉
六廣大轉

○初損益轉

一損力益能轉。謂初二位。由習勝解及慚愧故。損本識中染種勢力。益本識內淨種功能。雖未斷障種實證轉依而漸伏現行。亦名為轉。

初標列轉名。二原釋損益。三縱奪釋轉。一位指資

加謂資糧位。具四力修六行。發三心。以聞熏修。悟唯識性相。具習勝解。加行位起。四尋思發。四如實觀。二取空具。慚愧羞耻。過惡也。損益等者。謂由習殊勝解及慚愧過惡之力。故能損減依附異熟識中。煩惱熏習染種發現之勢力。增益依附異熟識中。所習淨法起現之功能也。恐疑此際尚未能斷障種。何名為轉。故先縱而後奪云。雖未斷分別障種。實證轉依。以漸伏分別現行。使之不行。是亦轉其行於不行。故亦名轉耳。

○二通達轉

二通達轉謂通達位。由見道力。通達真如。斷分別生。
二障。麤重。證得一分真實轉依。

由見道力。通達真如者。體會曰通達。能見諦理。無
壅塞也。斷分別生。二障。麤重者。頓斷分別我法二
障種子也。證得一分真實轉依者。得根本智。證徧
行真如。得一分真實轉依。曰通達轉。

○三修習轉

三修習轉。謂修習位。由數修習十地。行故。漸漸俱生。
二障。麤重。漸次證得真實轉依。攝大乘中說。通達轉
在前六地。有無相觀。通達真俗間雜現前。今真非真。

現不現故。說修習轉在後四地。純無相觀。長時現前。
勇猛修習。斷餘麤重。多令非真不顯現故。

初正釋修習。二會通攝論。數數修習十地。十種勝
行。無間曰修習。由數修習。漸漸俱生我法種子。漸
證十種真實轉依。曰轉。是從初地後心。至十地皆
名修習轉也。若證於攝論說。通前六地。皆名通達
轉。以有相觀。通俗。無相觀。達真。入無相觀。真現而
非真不現。出無相觀。真亦不現。入有相觀。則非真
現而真不現也。故名通達轉。說修習轉。在後四地。
以無相觀。長時現前。勇猛修習。斷餘麤重。多令非

真不現前故。夫日多令不現，則無相觀之常現可知。夫日多令不現，則非真之猶現可知。而日純無相觀者何也。曰：此對前之間雜。曰：純。尅體而論。純中猶有未純在也。故八地已上方是真純。愚謂前六後四充類至義之盡之言也。亦可初地後心勝。進入二地已來，亦通修習轉。故云修十地行故等也。

○四圓滿轉

四果圓滿轉。謂究竟位。由三大劫阿僧祇耶。修習無邊難行勝行。金剛喻定。現在前時。永斷本來一切塵重。頓證佛果圓滿轉依。窮未來際利樂無盡。

從資糧至加行。可名相似轉。從初地至十地。可名分證轉。唯此得名圓滿轉。謂究竟位。三大無數劫。修習無邊勝行。日行圓滿。自資糧至等覺無間道。普光明等十大三昧。金剛喻定。現在前時。永斷本來一切種盡。曰：斷圓滿。至解脫道。頓證佛果圓滿轉依。曰：證圓滿。遡流窮源。證由於斷。斷由於修。故曰：由三大阿僧祇耶。修習至於證圓滿也。修之時。義大矣哉。窮未來際利樂無盡。對上自利圓滿。此名利生圓滿。但利生無圓滿時。窮未來際利樂無

盡。是謂圓滿利生耳。圓滿利生。故曰無盡。

○五下劣轉

五下劣轉。謂二乘位。專求自利。厭苦欣寂。唯能通達生空真如。斷煩惱種。證真擇滅。無勝堪能。名下劣轉。專求自利。志下劣也。厭苦欣寂。行下劣也。唯達生空。解下劣也。斷煩惱種。斷下劣也。證真擇滅。證下劣也。無二利勝能。等觀勝能。大解勝能。雙斷勝能。雙證勝能。故從初至證。雖得名轉。轉非殊勝。眇目矧陋。曰下劣轉。

○六廣大轉

六廣大轉。謂大乘位。為利他故。趣大菩提。生死涅槃。俱無欣厭。具能通達二空真如。雙斷煩惱。所知障種。頓證無上菩提涅槃。有勝堪能。名廣大轉。此中意說。廣大轉。依捨二麓重。而證得故。

廣大轉。翻上可知。此中意說等。簡定頌意也。以頌言。捨二麓重。故便證得轉依者。意取第六廣大轉。依。雖對菩薩。唯取大乘因位。而圓滿自在其中。以云頓證無上菩提涅槃故也。上正釋轉依中。初明位別竟。

○二明義別二 初總標二別釋

○初總標

轉依義別畧有四種。

○二別釋四 初能轉道二所轉依三所轉捨四所轉得

○初能轉道二 初正釋二料簡

○初正釋

一能轉道。此復有二。一能伏道。謂伏二障隨眠勢力。令不引起二障現行。此通有漏無漏二道。加行根本。後得。三智隨其所應。漸頓伏彼。二能斷道。謂能永斷二障隨眠。此道定非有漏加行。有漏曾習相執所引。

未泯相故。加行趣求所證所引。未成辦故。

能轉道對所轉依言。能轉道有二。一能伏道。二能斷道。能伏。謂二障種有能生現行勢力。修六行及加行等智伏之。令不現起。此通漏無漏道。謂六行漸伏。唯通有漏。若加行智後得智漸伏。通漏無漏。若根本智頓伏。唯通無漏故。二能斷者。謂起根本無分別智。能永斷二障隨眠。此能斷道。不通有漏道及加行智。二道中除有漏道。三智中除加行智也。除有漏者。以有漏道是曾習相執所引。未泯相故。謂第七念念執我。令第六所行施等不能亡相。

雖有漏道常起現行而不爲損。亦無所益。故能斷道。唯取無漏。除加行者。以加行之智。雖勤勇趣求。而於所證真如之理。所引根本之智。未能成辦。故除之也。此能轉道之差別如此。

○二料簡

有義根本無分別智。親證二空所顯真理。無境相故。能斷隨眠。後得不然。故非斷道。有義後得無分別智。雖不親證二空真理。無力能斷迷理隨眠。而於安立非安立相。明了現前無倒證故。亦能永斷迷事隨眠。故瑜伽說修道位中有出世斷道。世出世斷道。無純

世間道。能永害隨眠。是曾習故。相執引故。由斯理趣。諸見所斷。及修所斷。迷理隨眠。唯有根本無分別智。親證理故。能正斷彼。餘修所斷迷事隨眠。根本後得。俱能正斷。

初師唯取根本智能斷隨眠。次師雙取。以根本能斷迷理迷事隨眠。後得亦斷迷事隨眠。證之於瑜伽。則修道位中根本智。名出世斷道。後得名世出世斷道。加行名純世間道。無能永害等者。以唯在地前伏除分別二障現行。不能永害隨眠也。曾習故。相執引故。出所以。如前所釋。由斯理趣。諸見所

斷及修所斷迷理隨眠。唯根本無分別智。親證理故。能正斷彼。餘修所斷迷事隨眠。根後俱能正斷。較量二說。此說爲正。迷理事者。別迷心曰迷理。任運迷境曰迷事。又迷已爲物曰迷理。認物爲已曰迷事。

○二所轉依

二所轉依。此復有二。一持種依。謂根本識。由此能持染淨法種。與染淨法俱爲所依。聖道轉令捨染得淨。餘依他起性。雖亦是依。而不能持種。故此不說。二迷悟依。謂真如。由此能作迷悟根本。諸染法淨法依之得生。聖道轉令捨染得淨。餘雖亦作迷悟法依。而非根本。故此不說。

所轉依。對能轉道言。依有二種。謂持種依。迷悟依。持種依者。第八本識。持染淨種。與染現行淨現行法爲所依。曰轉者。修聖道時。轉令捨染得淨。曰轉依也。雖前七識等。並依他起。亦所依法。不能持種。故此不說。迷悟依者。謂真如法。是迷悟根本。與染淨法爲所依。曰轉者。修聖道時。令捨染得淨。曰轉依也。雖餘依他起。亦迷悟依。而非根本。故此不說。一性觀之。持種依是約相宗。迷悟依是約性宗。究

竟論之。真如卽唯識實性。識與真如非一非異。

○三所轉捨二 初正釋二料簡

○初正釋

三所轉捨。此復有二。一所斷捨。謂二障種。真無間道。現在前時。障治相違。彼便斷滅。永不成就。說之爲捨。彼種斷故。不復現行。妄執我法。所執我法不對妄情。亦說爲捨。由此名捨。徧計所執。二所棄捨。謂餘有漏。劣無漏種。金剛喻定。現在前時。引極圓明純淨本識。非彼依故。皆永棄捨。彼種捨已。現有漏法及劣無漏。畢竟不生。旣永不生。亦說爲捨。由此名捨。生死劣法。

三所轉捨。對所轉得言。捨有二種。一斷捨。二棄捨。斷捨者。真無間道。斷二障種。種斷而現。伏名捨。妄執我法之心。所執我法之境。對妄情而現行之。徧計皆捨也。二棄捨者。金剛喻定。引極圓明無漏本識。二障種外。餘有漏善種。及劣無漏種。無所依故。皆永棄捨。名捨。種捨而現。永不生。亦名爲捨。由此名捨。生死劣法。以餘有漏善。能感分段生死。劣無漏善。其力但能感變易生死。故也。又斷乃彼障。此治敵體相違。猶水與火。不可並立。棄則能依之法。無所依而自消。無漏善。生漏善。自滅。勝法圓明。劣

法自遣矣。

○三料簡

有義所餘有漏法種及劣無漏。金剛喻定現在前時。皆已棄捨。與二障種俱時捨故。有義爾時猶未捨彼。與無間道不相違故。菩薩應無生死法故此位應無所熏識故。住無間道應名佛故。後解脫道應無用故。由此應知。餘有漏等。解脫道起。方棄捨之。第八淨識。非彼依故。

初師以餘三種及二障種俱時捨於金剛喻定。次師以五所以斷其未捨。一不相違故不捨。謂斷須

障治相違。無間道與劣無漏種。及有漏善種不違。豈能捨耶。二菩薩應無生死法故不捨。謂無間道時。菩薩尚有一分變易生死。此時云捨。應無生死法耶。三無間位應無所熏識故不捨。所熏識即異熟識。有漏善種及劣無漏種。皆此識執持。若此時所持既捨。能持異熟亦捨。則無間位應無所熏識耶。四若無間道時已捨異熟。則因位菩薩名爲佛耶。五既已名佛。起解脫道。應無有用。然而解脫起時。有能棄有漏善根及劣無漏種之用。有能證極果顯理之用。豈無用耶。展轉窮之。應知無間道時。

不捨此種解脫道起。方棄捨之。以第八淨識非彼所依故也。較量二說。後說爲正。

○四所轉得二 初所顯得二 所生得

○初所顯得二 初明通體二 彰義別

○初明通體

四所轉得。此復有二。一所顯得。謂大涅槃。此雖本來自性清淨。而由客障覆令不顯。真聖道生。斷彼障。故令其相續。名得涅槃。此依真如離障施設。故體卽是清淨法界。

涅槃云圓寂。大者通俱後三。謂無上大涅槃也。以

體全法界德滿塵沙。曰圓。妙絕相累。究竟離念。曰寂。所轉得對所轉捨。以有轉捨必有轉得故也。初至名得涅槃。縱難奪釋。顯得。次至清淨法界。括意結釋。本淨。此雖本來之此。指大涅槃。謂有難言。此大涅槃。本來自性清淨。曰得者何。故縱難而奪釋云。此雖本來等云云也。此依真如之此。指所顯得。謂更難云。旣云顯得。卽屬新淨。曰本來者何。故括釋意而結釋之云。此依真如等云云也。

○二彰義別三 初正釋二 料簡三 結名

○初正釋

涅槃義別畧有四種。一本來自性清淨涅槃。謂一切法相真如理。雖有客染。而本性淨。具無數量微妙功德。無生無滅。湛若虛空。一切有情平等共有。與一切法不一不異。離一切相。一切分別。尋思路絕。名言道斷。唯真聖者自內所證。其性本寂。故名涅槃。二有餘依涅槃。謂即真如出煩惱障。雖有微苦所依未滅。而障永寂。故名涅槃。三無餘依涅槃。謂即真如出生死苦。煩惱既盡。餘依亦滅。眾苦永寂。故名涅槃。四無在處涅槃。謂即真如出所知障。大悲般若常所輔翼。由斯不住生死涅槃。利樂有情。窮未來際。用而常寂。故名涅槃。

名涅槃。

上文通體既顯。大旨自彰。別義未明。細微不盡。故復畧開四種。一本來自性清淨涅槃。二有餘依涅槃。三無餘依涅槃。四無在處涅槃。本來自性清淨者。謂蘊處界等一切法相所依真理。雖有客塵煩惱所染。本性清淨。具無數量微妙功德。無生無滅。湛若虛空。不簡有情聖凡平等共有。曰本淨。與一切法不一不異等。乃至本寂曰涅槃。不一異者。一則真如應是無常。異則真如非法實性故。離一切相。一切分別者。謂不可以有無等四句分別之也。

尋思路絕者。離顯境名言。不可以識識也。名言道斷者。離表義名言。不可以言言也。二有餘依者。真如出煩惱障。子縛已盡。無有喧動。曰涅槃。身智未泯。果縛猶存。餘微苦依。曰有餘依涅槃也。三無餘依者。真如出生死苦。煩惱既盡。衆苦已寂。曰涅槃。身智復滅。果縛亦忘。苦依殆盡。曰無餘依涅槃也。四無住處者。謂卽真如出所知障。非有餘無餘。但出於煩惱障。大悲般若。常爲輔翼。非有餘無餘。猶住於涅槃也。利樂有情。窮未來際。非有餘無餘。不能利生之無盡也。問。窮未來際。利樂有情。利他妙

用得矣。何名涅槃。答。用而常寂。故名涅槃。則此對前二。可名有住涅槃。前二形此。得名無住涅槃。良以用而常寂。不住生死。豈不寂而常用。不住涅槃。二邊不住。故名無住。

○二料簡二 初通約凡聖總簡二復申問答別釋

○初通約凡聖總簡

一切有情皆有初一。二乘無學。容有前三。唯我世尊。可言具四。

上文正釋涅槃。別義似明。然所以別者。猶未能詳

明也。何則。法元無異。異由於人。若不通爲料簡。別致問酬。則微細何由而現。委曲何自而彰乎。故又先通簡而後別釋也。有情曰一切皆有。則凡聖外微細昆蟲曷常欠一毫毛。雜華云奇哉衆生。云何具有如來智慧德相是也。但以無明妄想執著而不證得。故無後三耳。餘文可知。然則有情但性具而已。有情如二乘無學。雖具性修於修尚缺。有情如世尊始得性修圓滿。通論差別如此。

○二復申問答別釋六 初躡世尊釋有餘二躡聲聞釋無依三躡所知釋感得四躡感得釋障

得五躡障得釋斷得六躡斷得釋障說

○初躡世尊釋有餘

如何善逝。有有餘依。雖無實依而現似有。或苦依盡說無餘依。非苦依在。說有餘依。是故世尊可言具四。如何善逝。有有餘依。躡前世尊可言具四問也。意謂二死已離。諸苦永寂。名佛。何復有苦依。曰有餘依耶。答中。初約實無似有。示現答。二約表無遮有顯說答。實無者。無實有餘依也。似有者。示現似有餘依也。如病時須乳。及金鎗背痛等。雖無實有餘依。以爲衆生故。示現有身必苦。因果之不忘也。表

無者。或苦依盡。說無餘依。表有無餘依也。遮有者。非苦依在。說有餘依。遮有漏蘊爲有餘依也。故云非苦依在。說有餘依。隱然於苦依無處。說有餘依耳。無處說有。豈非以無漏蘊爲依乎。

○二躡聲聞釋無餘

若聲聞等有無餘依。如何有處說彼非有。有處說彼都無涅槃。豈有餘依。彼亦非有。然聲聞等身智在時。有所知障。苦依未盡。圓寂義隱。說無涅槃。非彼實無煩惱障盡。所顯真理有餘涅槃。爾時未證無餘圓寂。故亦說彼無無餘依。非彼後時滅身智已。無苦依盡。

無餘涅槃。或說二乘無涅槃者。依無住處。不依前三。又說彼無無餘依者。依不定性。二乘而說。彼纔證得有餘涅槃。決定迴心求無上覺。由定願力留身久住。非如一類入無餘依。謂有二乘深樂圓寂。得生空觀。親證真如。永滅感生煩惱障盡。顯依真理有餘涅槃。彼能感生煩惱盡。故後有異熟。無由更生現苦所依。任運滅位。餘有爲法既無所依。與彼苦依同時頓捨。顯依真理無餘涅槃。爾時雖無二乘身智。而由彼證可說彼有。此位唯有清淨真如。離相湛然。寂滅安樂。依此說彼與佛無差。但無菩提利樂他業。故復說彼

與佛有異。

初躡前問難。次約義隱答。三約實無答。四轉釋一類。若聲聞等有無餘依。躡前容有前三也。如何有處說彼非有無餘。有處說彼無餘有餘。都無。約他處違前容有爲問也。豈有餘依。彼亦非有。據法合人難有餘。非有之未合也。義隱答者。都無之義。隱於身智在時有所知障。苦依未盡。說有餘無餘。都無。非彼實無煩惱障盡。所顯真理有餘涅槃。無無餘義。隱於此時未證無餘圓寂。說彼無無餘依。非彼後時滅身智已。無苦依盡。無餘涅槃也。實無者。

約實無無住涅槃。曰無涅槃。非無前三名無涅槃也。又實無無餘涅槃。名無涅槃者。非無有餘名無涅槃。以不定性聲聞。纔證有餘。廻小向大。不入無餘依之故耳。非如一類入無餘依者之可同也。一類入無餘依。釋有三段。一釋入無餘。二通妨身智。三對佛辨異。釋入無餘者。謂有一類二乘。根則深。樂圓寂。觀則得生空觀。證則親證真如。滅則永滅。感生煩惱障盡。顯依真理有餘涅槃。彼能感生煩惱盡故。後有異熟。無由更生。彼現在衆苦之身。亦隨業盡。任運滅位。則二乘觀智及相應心品之餘。

有爲法。名能依者。既無所依。與彼苦依。同時頓捨。顯依真理。無餘涅槃。日入無餘依也。通妨身智者。恐有難云。既無身智。誰爲能證。通云。爾入無餘依時。雖無身智。然先曾由彼身智證得。故可假說彼有身智耳。對佛辨異者。此位與佛亦異亦同。以此位唯有清淨真如。湛寂安樂。說與佛同。但無上求菩提。下利他業。因乖萬行。果缺圓常。與佛異耳。

○三躡所知釋感得

諸所知障。既不感生。如何斷彼得無住處。彼能隱覆法空真如。令不發生大悲般若。窮未來際。利樂有情。

故斷彼時顯法空理。此理卽是無住涅槃。令於二邊俱不住故。

感得者。問意云。感而後生。由煩惱障。以是不善性故。斷彼得二涅槃。所知是無記性。既非感生。如何斷之。亦得無住涅槃耶。釋感得者。意謂所知雖不感生。雖障法空真理。卽障利他大悲。故斷彼時顯法空理。此所顯理。卽是不住二邊之妙涅槃理。是以斷彼得無住處。

○四躡感得釋障得

若所知障。亦障涅槃。如何斷彼。不得擇滅。擇滅離縛。

彼非縛故。

障得者。問意云。所知既障無住涅槃。斷障應得擇滅無爲。以擇滅智斷一分障。顯一分理。故意以擇滅可盡攝諸涅槃也。不知擇滅無爲。是離煩惱障縛所顯。彼所知障。既不感生。非同煩惱能縛有情。住於生死。故斷彼時。不得擇滅無爲。但證真如無爲耳。

○五躡障得釋斷得

既爾。斷彼寧得涅槃。非諸涅槃皆擇滅攝。不爾。性淨。應非涅槃。能縛有情住生死者。斷此說得擇滅無爲。

諸所知障不感生死。非如煩惱能縛有情。故斷彼時。不得擇滅。然斷彼時。法空理顯。此理相寂。說爲涅槃。非此涅槃。擇滅爲性。故四圓寂。諸無爲中。初後卽真如。中二擇滅攝。若唯斷縛得擇滅者。不動等二四中。誰攝。非擇滅攝。說暫離故。擇滅無爲。唯究竟滅。有非擇滅。非永滅故。或無住處。亦擇滅攝。由真擇力。滅障得故。擇滅有二。一滅縛得。謂斷感生煩惱得者。二滅障得。謂斷餘障而證得者。故四圓寂。諸無爲中。初一卽真如。後三皆擇滅。不動等二暫伏滅者。非擇滅攝。究竟滅者。擇滅所攝。

初明無住非擇滅攝。次明無住亦擇滅攝。於無住非擇滅攝中。曲分爲二。初至中。二擇滅攝。是問答明。非明二無爲攝。四涅槃。次至非永滅故。是問答明。非擇滅攝。二無爲。二無爲攝。四涅槃。躡前彼非縛故。問云。旣所知非縛。斷彼寧得涅槃。意以諸涅槃皆擇滅攝也。不知前四涅槃有是擇滅攝。非擇滅攝者。故云。非諸涅槃皆擇滅攝。若謂不爾。皆屬擇滅攝者。則初一性淨。旣非斷障所得。屬於擇滅。乃應非涅槃矣。然而不可不謂之淨性涅槃也。是以非皆攝者。以能縛有情住生死者。斷此說得擇滅無。

爲諸所知障不感生死。不縛有情。故斷彼時。不得擇滅。雖是不得。以斷彼故。法空理顯。此理相寂。說爲涅槃。非此涅槃。以擇滅爲性也。故四圓寂。於諸無爲中。初性淨。後無住。此二涅槃。真如無爲攝。中間有餘無餘二涅槃。卽擇滅無爲攝。是謂二種無爲能攝四種涅槃也。非擇滅攝。二無爲者。牒前問云。若唯斷縛得擇滅者。卽如第四禪名不動滅。無爲等滅。受想無爲。此二無爲。在虛空與擇滅。并非擇滅。及真如之四無爲中。是誰所攝耶。答云。此二無爲。在四無爲中。是非擇滅無爲攝。以此二種緣。

闕不生說暫離故。非是擇滅。以擇滅無爲。唯究竟滅。有非擇滅。是暫離故。非究竟滅。是以非擇滅。二無爲也。展轉窮之。無住涅槃。非擇滅攝也。明矣。次明無住。亦擇滅攝者。或無住處。亦擇滅攝。以由法空觀智。真擇滅力。斷所知障。而證得故。恐有難云。前云無住。非擇滅攝。今何又云。亦擇滅攝耶。故云。擇滅有二云云也。意謂前約離縛所得擇滅。說擇滅不攝無住。此約滅障所得擇滅。說擇滅亦攝無住耳。故四圓寂。諸無爲中。初一卽真如無爲攝。後三皆擇滅無爲攝。不動等二。暫伏滅者。非擇滅無

爲攝。究竟滅者。擇滅所攝。問。暫伏究竟。其義云何。曰。二乘那含。及菩薩七地前。所入捨念清三昧。及滅盡定。由俱生煩惱未永斷伏。故名暫伏滅。三乘無學果人。所入二定。由永斷伏。俱生煩惱。故名究竟滅。具如成實論中。

○六躡斷得釋障說

既所知障亦障涅槃。如何但說是菩提障。說煩惱障。但障涅槃。豈彼不能爲菩提障。應知聖教。依勝用說。理實俱能通二障果。

問意謂。既所知障亦障涅槃。何聖教但說是智障。

不言障涅槃耶。答云。欲知所說。當觀說依。如煩惱固障涅槃。亦障菩提。乃教說煩惱。但障涅槃。豈彼不能障菩提耶。由此觀之。應知聖教各依殊勝之用而說。以理論之。實則煩惱所知。俱能通障二果。不察其依。徒觀其說。說豈能知。

○三結名

如是所說四涅槃中。唯後三種名所顯得。

初非顯得者。以自性淨寂名爲涅槃。不由斷障所顯得故。卽性宗真如門也。則後三反妄歸真屬生滅可知。

○二所生得二 初正釋二 總結

○初正釋二 初總標釋二 別徵釋

○初總標釋

二所生得。謂大菩提。此雖本來有能生種。而所知障礙故不生。由聖道力斷彼障故。令從種起。名得菩提。起已相續。窮未來際。此卽四智相應心品。

謂大菩提。指所生得之果。此卽四智相應心品。指所生得果體。起已相續。窮未來際。顯無終窮果用。此雖本來等。通妨難也。恐問此大菩提本有能生之種。何名爲得。故云此雖本來有能生種等云云。

也。聖道力卽法空觀智力也。

○二別徵釋三 初明四智相用二明四智起位

三明明四智緣用

○初明四智相用六 初大圓鏡二平等性三妙

觀察四成所作五結立名六明轉依

○初大圓鏡

云何四智相應心品。一大圓鏡智相應心品。謂此心品離諸分別。所緣行相微細難知。不妄不愚。一切境相性相清淨。離諸雜染。純淨圓德。現種依持。能現能生。身土智影。無間無斷。窮未來際。如大圓鏡現衆色

像。

明大圓鏡智相用也。徵意謂既生得菩提卽四智相應心品。智品不詳。菩提不顯。故問云何等者。欲窮其相用。及與起位。發明乎緣用。使知何以名四智。何以名心品。而得昭然于所生得之菩提也。故釋云。大圓鏡智及成所作智。乃至此四心品云云也。大圓鏡智相應心品。其義有七。一此心品離諸分別。智體能所雙絕。永出煩惱所知障故。二所緣行相微細難知。非愚昧等智所可測故。三不妄不愚。一切境相。普於一切所知障境。不愚迷故。四性

相清淨。智光明鑑。性相俱無垢故。五離諸雜染。純淨圓德。現行功德。此爲所依。種子功德。此爲能持。無漏德所依持故。六能現能生身土智影。自受用身土。此智能現。餘三智影。此智能生故。七無間無斷。窮未來際。常恒寂用。無終盡故。如大圓鏡現衆色像者。以喻合法。具前義故。又此智七義。對第八識未轉依時。一一相翻符合可知。具釋如佛地經。莊嚴論中。又相應心品者。卽淨八識。與自相應。三十一法。和合共成一聚。曰品。品者品類。下三心品例此。

○二平等性

二平等性。智相應心品。謂此心品。觀一切法。自他有情。悉皆平等。大慈悲等。恒共相應。隨諸有情。所樂示現。受用身土。影像差別。妙觀察智。不共所依。無住涅槃之所建立。一味相續。窮未來際。

明平等性。智相用也。觀一切法。自他有情。悉平等者。因中執我與一切法。自他差別。今轉識成智。我法既除。故皆平等。如佛地謂證得諸相。增上喜受平等。一切領受緣起平等。遠離異相。非相平等。弘濟大悲平等。無待大悲平等。隨諸衆生所樂示現。

平等。一切衆生敬愛所說平等。世間寂靜皆同一味平等。世間諸法苦樂一味平等。修植無量功德平等。證此十相。名平等性智也。大慈悲等恒共相應者。恒與慈悲喜捨相應。異未轉依時。癡愛慢見之相應也。隨諸有情所樂示現差別者。爲十地菩薩現他受用身土差別利益之不同也。妙觀察智不共所依者。因中爲第六所依之根。果時亦爲妙觀察智所依之根。云不共者。以智各有所依故也。無住涅槃之所建立者。悲與智合。不住邊故。一味一無漏味。相續者。無漏無間。窮未來際。無盡時也。

問。大圓平等。此之平等。若是均乎。曰。大圓平等。如明鏡現像。鏡無現像之念。性智平等。似秋月流空。空無異月之輝。思之可知。

○三妙觀察

三妙觀察智相應心品。謂此心品善觀諸法自相共相無礙而轉攝觀無量總持之門。及所發生功德珍寶。于大衆會能現無邊作用差別。皆得自在。兩大法雨斷一切疑。令諸有情皆獲利樂。

明妙觀察智相用也。自謂色心共謂無常苦空等。又圓成實性爲共。依他起性爲自。功德謂六度道。